

ՀԱՄԱՁԱՅՆԱԳԻՐ

Հայաստանի Հանրապետության Կառավարության և Ռուսաստանի Դաշնության Կառավարության միջև Հայաստանի Հանրապետությունում Ռուս-Հայկական համալսարանի գործունեության պայմանների մասին

Հայաստանի Հանրապետության Կառավարությունը և Ռուսաստանի Դաշնության Կառավարությունը, այսուհետ՝ Կողմեր,

ելնելով Հայաստանի և Ռուսաստանի միջև դաշնակցային հարաբերություններից և եղբայրական բարեկամությունից,

դեկլարվելով «Հայաստանի Հանրապետության Կառավարության և Ռուսաստանի Դաշնության Կառավարության միջև բարձրագույն կրթության բնագավառում համագործակցության վերաբերյալ» 1993 թվականի հունվարի 11-ի համաձայնագրով, «Հայաստանի Հանրապետության և Ռուսաստանի Դաշնության միջև բարեկամության, համագործակցության և փոխադարձ օգնության մասին» 1997 թվականի օգոստոսի 29-ի պայմանագրով,

նպատակ ունենալով Կողմերի պետությունների ժողովուրդների կրթության և մշակույթի զարգացման գործում հետագա փոխգործակցության համար ստեղծելու առավել բարենպաստ պայմաններ,

ելնելով 2003 թվականի ապրիլի 23-ի «Հայաստանի Հանրապետության Կառավարության և Ռուսաստանի Դաշնության Կառավարության միջև 1997 թվականի օգոստոսի 29-ի «Հայաստանի Հանրապետության Կառավարության և Ռուսաստանի Դաշնության Կառավարության միջև Երևան քաղաքում Ռուս-Հայկական համալսարանի հիմնադրման և գործունեության պայմանների մասին» համաձայնագրում փոփոխություններ և լրացումներ կատարելու վերաբերյալ» համաձայնագրով փոփոխված և լրացված՝ «Հայաստանի Հանրապետության Կառավարության և Ռուսաստանի Դաշնության Կառավարության միջև Երևան քաղաքում Ռուս-Հայկական համալսարանի հիմնադրման և գործունեության պայմանների մասին» 1997 թվականի օգոստոսի 29-ի համաձայնագրի (այսուհետ՝ Հիմնադիր համաձայնագիր) իրագործման կուտակված փորձից,

ընդունելով «Ռուս-Հայկական Համալսարան» (այսուհետ՝ Համալսարան) բարձրագույն կրթության կրթական կազմակերպության հետագա զարգացմանն ուղղված միջոցառումների ձեռնարկման անհրաժեշտությունը,

համաձայնեցին հետևյալի մասին.

Հոդված 1

Իրավական կարգավիճակը

Սույն Համաձայնագրով Կողմերն ամրագրում են Հիմնադիր համաձայնագրով ստեղծված Համալսարանի գործունեության պայմանները:

Համալսարանը բարձրագույն կրթության միջպետական կրթական կազմակերպություն է, որը համատեղ կառավարվում է Հայաստանի Հանրապետության և Ռուսաստանի Դաշնության կողմից:

Հայաստանի Հանրապետության օրենսդրության համապատասխան՝ Համալսարանը հանդիսանում է Հայաստանի Հանրապետության պետական համալսարան և ունի հիմնադրամի կարգավիճակ:

Ռուսաստանի Դաշնության օրենսդրության համապատասխան՝ Համալսարանն օգտվում է Ռուսաստանի Դաշնությունում բարձրագույն կրթության դաշնային պետական կրթական կազմակերպության կարգավիճակից:

Համալսարանը իրավաբանական անձ է:

Համալսարանը գործում է Համալսարանի կանոնադրության (այսուհետ՝ Կանոնադրություն) հիման վրա, որը հաստատվում է սույն Համաձայնագրի 2-րդ հոդվածում նշված Կողմերի լիազորված մարմինների (այսուհետ՝ Լիազորված մարմիններ) կողմից:

Համալսարանի աշխատանքային լեզուներն են հայերենը և ռուսերենը:

Համալսարանում գործավարությունն իրականացվում է ռուսերենով, իսկ Հայաստանի Հանրապետության օրենսդրությամբ նախատեսված կրթական ծրագրերի իրականացման շրջանակներում՝ հայերենով: Հայերենն օգտագործվում է Համալսարանի և Հայաստանի Հանրապետության պետական գերատեսչությունների ու կազմակերպությունների միջև նամակագրության համար:

Հոդված 2

Լիազորված մարմինները

Լիազորված մարմիններն են՝

- Հայկական կողմից՝ Հայաստանի Հանրապետության կրթության, գիտության, մշակույթի և սպորտի նախարարությունը (այսուհետ՝ Հայկական Կողմից Լիազորված մարմին).

- Ռուսական կողմից՝ Ռուսաստանի Դաշնության գիտության և բարձրագույն կրթության նախարարությունը (այսուհետ՝ Ռուսական Կողմից Լիազորված մարմին):

Լիազորված մարմնի անվան փոփոխության և (կամ) նրա գործառույթները պետական կառավարման մեկ այլ մարմնի (այլ մարմինների) փոխանցելու մասին Կողմը դիվանագիտական ուղիներով անհապաղ գրավոր ծանուցում է ուղարկում մյուս Կողմին:

Հոդված 3 **Համալսարանի խնդիրները**

Համալսարանի խնդիրներն են՝

- բարձր որակավորում ունեցող կադրերի, այդ թվում՝ գիտական և գիտամանկավարժական կադրերի պատրաստում Հայաստանի Հանրապետությունում հաստատված պետական կրթական չափորոշիչներին ու պահանջներին և Ռուսաստանի Դաշնությունում հաստատված դաշնային պետական կրթական չափորոշիչներին ու դաշնային պետական պահանջներին համապատասխան,

- կրթական, գիտական և նորարարական գործունեության իրականացում,

- հիմնարար և կիրառական գիտական հետազոտությունների անցկացում Հայաստանի Հանրապետության, Ռուսաստանի Դաշնության և այլ պետությունների բարձրագույն կրթության կրթական կազմակերպությունների և գիտական կազմակերպությունների հետ համատեղ,

- գիտատեխնիկական նախագծերի իրականացում, այդ թվում՝ որպես պատվիրատու՝ գործարար համայնքի ներկայացուցիչների ներգրավմամբ,

- գիտության աջակցություն և ֆինանսավորում, յուրահատուկ կոմպետենցիաների զարգացում,

- անձի կրթական պահանջմունքների բավարարում, աջակցություն Կողմերի պետությունների ժողովուրդների մշակույթների, լեզուների, պատմական և ազգային ավանդույթների պահպանմանը, զարգացմանը և փոխհարստացմանը,

- լուսավորչական միջոցառումների անցկացում ռուսաց լեզվի և ռուսական մշակույթի հանրայնացման նպատակով,

- Հայաստանի Հանրապետության հանրակրթական դպրոցների հետ փոխգործակցության ընդլայնման ապահովում,

- ռուսաց լեզու դասավանդողների որակավորման բարձրացման կենտրոնի ստեղծում և զարգացում,

- ակադեմիական փոխանակումների և ստաժավորման ծրագրերի իրականացում Հայաստանի Հանրապետության, Ռուսաստանի Դաշնության և այլ պետությունների բարձրագույն կրթության կրթական կազմակերպություններում և գիտական կազմակերպություններում,

- ռուսաստանյան կրթության ցուցահանդեսների և տոնավաճառների անցկացում,

- Հայաստանի Հանրապետության և Ռուսաստանի Դաշնության դերի և ազդեցության ուժեղացում համաշխարհային հումանիտար և գիտատեխնիկական ոլորտներում, Կողմերի պետությունների դրական իմիջի փոխադարձ ամրապնդում, ընդհանուր մշակութային, կրթական և գիտական տարածքի ամրապնդում:

Համալսարանի խնդիրների իրագործումն իրականացվում է կրթության և գիտության բնագավառում առաջատար տեխնոլոգիաների կիրառման, համաշխարհային լավագույն փորձի օգտագործման միջոցով:

Հոդված 4

Կրթական գործունեությունը

Համալսարանն իրականացնում է կրթական գործունեություն՝ Կողմերի պետությունների օրենսդրությամբ նախատեսված կրթական ծրագրերի պահանջներին համապատասխան:

Հայաստանի Հանրապետության օրենսդրությամբ նախատեսված կրթական ծրագրերի իրագործման շրջանակներում ուսուցումը Համալսարանում իրականացվում է հայերենով՝ ռուսերենի պարտադիր դասավանդմամբ:

Ռուսաստանի Դաշնության օրենսդրությամբ նախատեսված կրթական ծրագրերի իրագործման շրջանակներում ուսուցումը Համալսարանում իրականացվում է ռուսերենով՝ հայերենի պարտադիր դասավանդմամբ:

Համալսարանի շրջանավարտների՝ հայերենի և ռուսերենի տիրապետման մակարդակը պետք է բավարարի հաղորդակցման պահանջներին և թույլ տա իրականացնել մասնագիտական գործունեություն հայերենով և ռուսերենով՝ մասնագիտություններին, գիտական մասնագիտություններին և պատրաստման ուղղություններին համապատասխան:

Լիազորված մարմինների համաձայնությամբ Համալսարանում կարող են ստեղծվել Հայաստանի Հանրապետության, Ռուսաստանի Դաշնության և այլ պետությունների կրթական և (կամ) գիտական կազմակերպությունների ամբիոններ և այլ կառուցվածքային ստորաբաժանումներ Համալսարանի և համապատասխան կազմակերպությունների միջև կնքված համաձայնագրերի հիման վրա:

Ամբողջական ծավալով կրթական ծրագրերը յուրացրած և պետական ամփոփիչ ատեստավորումը հաջողությամբ անցած անձանց տրվում են Կողմերի պետությունների կրթության և (կամ) որակավորման մասին փաստաթղթեր կամ այլ փաստաթղթեր:

Հայաստանի Հանրապետության օրենսդրությամբ նախատեսված կրթական

ծրագրերի իրականացման շրջանակում կրթական գործունեության լիցենզավորումը և հավատարմագրումն իրականացվում են Հայաստանի Հանրապետության օրենսդրության համապատասխան:

Ռուսաստանի Դաշնության օրենսդրությամբ նախատեսված կրթական ծրագրերի իրականացման շրջանակում կրթական գործունեության լիցենզավորումն իրականացվում է Հայաստանի Հանրապետության և Ռուսաստանի Դաշնության օրենսդրություններին համապատասխան:

Ռուսաստանի Դաշնության օրենսդրությամբ նախատեսված կրթական ծրագրերի իրականացման շրջանակում կրթական գործունեության պետական հավատարմագրումն իրականացվում է Ռուսաստանի Դաշնության օրենսդրության համապատասխան:

Հոդված 5

Համալսարանի կառավարման մարմինները

Կառավարման խորհուրդը Համալսարանի կառավարման բարձրագույն կոլեգիալ մարմինն է:

Համալսարանի միանձնյա գործադիր մարմինը Համալսարանի ռեկտորն է (այսուհետ՝ Ռեկտոր):

Գիտական խորհուրդը Համալսարանի կոլեգիալ կառավարման մշտապես գործող մարմինն է:

Կանոնադրությամբ կարող է նախատեսվել կառավարման այլ մարմինների ստեղծում՝ յուրաքանչյուր Կողմի պետության օրենսդրության համապատասխան:

Հոդված 6

Կառավարման խորհուրդը

Կառավարման խորհուրդը կազմված է 12 անդամից՝ 4 ներկայացուցիչ յուրաքանչյուր Լիազորված մարմնից և 4 ներկայացուցիչ Համալսարանից՝ խորհրդակցական ծայնի իրավունքով:

Համալսարանի ներկայացուցիչները առաջարկվում են Համալսարանի Գիտական խորհրդի կողմից՝ համաձայն Կանոնադրության, և համաձայնեցվում Լիազորված մարմինների կողմից:

Կառավարման խորհրդում ընդգրկված Համալսարանի ներկայացուցիչները Համալսարանում չեն կարող զբաղեցնել ղեկավար պաշտոններ:

Կառավարման խորհրդի կազմը հաստատվում է Լիազորված մարմինների համատեղ հրամանով:

Լիազորված մարմինները դիվանագիտական ուղիներով միմյանց տեղեկացնում են իրենց ներկայացուցիչների թեկնածությունների մասին՝ Կառավարման խորհրդի կազմը ձևավորելու կամ փոփոխություններ կատարելու նպատակով: Համալսարանն իր ներկայացուցիչների թեկնածությունների մասին գրավոր տեղեկացնում է Լիազորված մարմիններին՝ Կառավարման խորհրդի կազմը ձևավորելու կամ փոփոխություններ կատարելու նպատակով:

Կառավարման խորհրդի գործունեությունը ղեկավարում են 2 համանախագահները, որոնք նշանակվում են Լիազորված մարմինների ղեկավարների կողմից՝ Կառավարման խորհրդի անդամ հանդիսացող իրենց ներկայացուցիչների կազմից:

Կառավարման խորհուրդը հաստատում է Համալսարանի կառուցվածքը և բյուջեն, Համալսարանի տարեկան ֆինանսական հաշվետվությունը, Համալսարանի գործունեության տարեկան հաշվետվությունը, Համալսարանի ռազմավարական ծրագիրը, ինչպես նաև քննարկում է սույն Համաձայնագրի իրագործման հետ կապված այլ հարցեր:

Կառավարման խորհրդի այլ լիազորությունները սահմանվում են Կառավարման խորհրդի կանոնակարգով, որը հաստատում են Լիազորված մարմինները:

Հոդված 7

Գիտական խորհուրդը

Գիտական խորհուրդը ձևավորվում է գիտամանկավարժական անձնակազմի, վարչակազմի ներկայացուցիչներից՝ ի դեմս ի պաշտոնե Համալսարանի ռեկտորի, պրոռեկտորների և ինստիտուտների տնօրենների ու Համալսարանի ուսումնառուների:

Գիտական խորհուրդը զբաղվում է Համալսարանի ակադեմիական գործունեության ընթացիկ և հեռանկարային զարգացման հարցերով և գործում է 5 տարի ժամկետով: Համալսարանի վարչակազմի ներկայացուցիչները չեն կարող կազմել Գիտական խորհրդի ընդհանուր կազմի 30%-ից ավելին:

Գիտական խորհրդի կառուցվածքը, ձևավորման կարգը, լիազորությունները և գործունեության կարգը սահմանվում են Կանոնադրությամբ:

Հոդված 8

Ռեկտորը

Ռեկտորն իրականացնում է Համալսարանի գործունեության անմիջական ղեկավարումը:

Ռեկտորի պաշտոնի թեկնածուներին ներկայացվող պահանջները, ընտրությունների անցկացման կարգը, ինչպես նաև Ռեկտորի իրավունքները, պարտականությունները և լիազորությունները սահմանվում են Կանոնադրությամբ:

Ռեկտորն ընտրվում է Կառավարման խորհրդի կողմից՝ Կանոնադրությանը համապատասխան, և պաշտոնում հաստատվում է Լիազորված մարմինների համատեղ հրամանով, մինչև 5 տարի ժամկետով: Նույն անձը չի կարող զբաղեցնել Ռեկտորի պաշտոնը ավելի քան 2 ժամկետ անընդմեջ:

Մինչև ընտրված Ռեկտորի նշանակումը Լիազորված մարմիններից մեկի անհամաձայնության դեպքում կարող է կիրառվել վետոյի իրավունք, որի արդյունքում Ռեկտորը համարվում է չընտրված:

Ռեկտորի թափուր պաշտոնի առկայության կամ գործող Ռեկտորի լիազորությունների իրականացման անհնարինության դեպքում 10 աշխատանքային օրվա ընթացքում հրավիրվում է Կառավարման խորհրդի նիստ՝ Ռեկտորի ժամանակավոր պաշտոնակատար նշանակելու համար: Կառավարման խորհրդի որոշմամբ Ռեկտորի ժամանակավոր պաշտոնակատար է նշանակվում այն ֆիզիկական անձը, որը համապատասխանում է Կանոնադրությամբ սահմանված՝ Ռեկտորի պաշտոնի թեկնածուներին ներկայացվող պահանջներին:

Եթե Ռեկտորի կողմից իրականացվում է այնպիսի գործունեություն, որն առաջացնում է Համալսարանի խնդիրներին հակասող հետևանքներ, ապա Կառավարման խորհուրդն իրավունք ունի Լիազորված մարմիններին Ռեկտորին անվստահություն հայտնելու հիմնավորված առաջարկություն ներկայացնելու, որի հիման վրա Լիազորված մարմինները համատեղ որոշմամբ իրավունք ունեն Ռեկտորին ազատելու իր զբաղեցրած պաշտոնից:

Ռեկտորը զբաղեցրած պաշտոնից ազատվում է Լիազորված մարմինների համատեղ հրամանով՝ Կողմերից մեկի նախաձեռնությամբ:

Ռեկտորի հետ աշխատանքային հարաբերությունները կարգավորվում են Ռեկտորի և որպես գործատու հանդես եկող ու Համալսարանի հիմնադիրների անունից գործող՝ Հայկական կողմից Լիազորված մարմնի միջև կնքված աշխատանքային պայմանագրով:

Հոդված 9

Ակադեմիական իրավունքները և ազատությունները

Համալսարանում գիտական և մանկավարժական աշխատողներին ու ուսումնառողներին երաշխավորվում են Կողմերի պետությունների օրենսդրությամբ նախատեսված ակադեմիական իրավունքներ ու ազատություններ:

Հոդված 10

Ընդունելության կանոնները

Համալսարան ընդունվելու իրավունքից օգտվում են կրթության համապատասխան մակարդակ ունեցող Հայաստանի Հանրապետության, Ռուսաստանի Դաշնության քաղաքացիները, այլ պետությունների քաղաքացիները և քաղաքացիություն չունեցող անձինք՝ անկախ սեռից, տարիքից, ռասայից, ազգությունից, լեզվից, ծագումից, գույքային, սոցիալական և պաշտոնական դիրքից, բնակության վայրից, կրոնի նկատմամբ վերաբերմունքից, համոզմունքներից, հասարակական միավորումներին պատկանելությունից, ինչպես նաև, Կողմերի պետությունների օրենսդրության համապատասխան, այլ հանգամանքներից:

Համալսարան ընդունելության կանոնները սահմանվում են Համալսարանի կողմից՝ Կողմերի պետությունների օրենսդրության համապատասխան:

Հայաստանի Հանրապետության կրթական ծրագրերով ուսուցման համար ընդունելությունն իրականացվում է Հայաստանի Հանրապետության կրթության մասին օրենսդրության համապատասխան: Ռուսաստանի Դաշնության կրթական ծրագրերով ուսուցման համար ընդունելությունն իրականացվում է Ռուսաստանի Դաշնության կրթության մասին օրենսդրության համապատասխան:

Ռուսաստանի Դաշնության դաշնային բյուջեի բյուջետային հատկացումների հաշվին ուսուցման համար ընդունելության տեղերի քանակը յուրաքանչյուր տարի սահմանում է Ռուսական Կողմի Լիազորված մարմինը Համալսարանի հայտի հիման վրա, որը տրվում և քննարկվում է Ռուսական Կողմի Լիազորված մարմնի սահմանած կարգով:

Հայաստանի Հանրապետության պետական բյուջեի միջոցների հաշվին ուսուցումը կազմակերպվում է Հայաստանի Հանրապետության օրենսդրության համապատասխան:

Ռուսաստանի Դաշնության դաշնային բյուջեի բյուջետային հատկացումների հաշվին ուսուցումը կազմակերպվում է Ռուսաստանի Դաշնության օրենսդրության համապատասխան:

Վճարովի կրթական ծառայություններ մատուցելու մասին պայմանագրերով Համալսարանն իրավունք ունի կրթական գործունեություն իրականացնելու ֆիզիկական և (կամ) իրավաբանական անձանց միջոցների հաշվին:

Հոդված 11
Գիտության և կրթության բնագավառում
միջազգային համագործակցությունը

Հայոց և ռուսաց լեզուների տարածման ու Կողմերի պետությունների ընդհանուր մշակութային, կրթական և գիտական տարածքն ընդլայնելու նպատակով Լիազորված մարմինները աջակցում են Համալսարանին Կողմերի պետությունների կրթական և գիտական կազմակերպությունների հետ համագործակցության զարգացման գործում:

Լիազորված մարմինները տեղեկացնում են Համալսարանին Հայաստանի Հանրապետության և Ռուսաստանի Դաշնության կրթության ու գիտության բնագավառում պետական ծրագրերին նրա մասնակցության հնարավորության մասին՝ նշված ծրագրերի իրագործմանը ուսումնառուներին, գիտական և մանկավարժական աշխատողներին ներգրավելու նպատակով:

Համալսարանի ուսումնառուների, մանկավարժական, գիտական և այլ աշխատողների միջազգային ակադեմիական շարժունակության միջոցով Համալսարանը զարգացնում է հումանիտար կապերը՝ համաշխարհային կրթական տարածքում մրցունակությունը բարձրացնելու համար:

Համալսարանի կողմից համագործակցության մասին համաձայնագրերի կնքումն իրականացվում է Կողմերի պետությունների օրենսդրության համապատասխան:

Հոդված 12
Համալսարանի ենթակառուցվածքը

Շենքերը, շինությունները, կառույցները և անշարժ գույքի այլ օբյեկտները, հողատարածքները, ինչպես նաև շարժական գույքի օբյեկտները, որոնք օգտագործվում են Համալսարանի կողմից և ներկայացվել են Կողմերի կողմից՝ որպես ներդրում Համալսարանի գույքային համալիրում, ներառյալ մինչև սույն Համաձայնագրի կնքումը, կամ ձեռք են բերվել Համալսարանի կողմից ցանկացած աղբյուրի միջոցների հաշվին, նախատեսված են բացառապես սույն Համաձայնագրի 3-րդ հոդվածում սահմանված՝ Համալսարանի խնդիրների կատարումն ապահովելու համար:

Կողմերն իրավունք ունեն մասնակցելու շենքերի վերանորոգման և վերակառուցման ֆինանսավորմանը, ինչպես նաև նոր շենքերի, շինությունների և օբյեկտների կառուցմանն ու ձեռքբերմանը՝ հետագայում դրանք փոխանցելու համար Համալսարանին սեփականության կամ անհատույց օգտագործման

հնարավորությամբ, Կողմերի պետությունների օրենսդրության համապատասխան:

Համալսարանի կողմից սույն Համաձայնագրով նախատեսված գործունեության իրականացման համար անհրաժեշտ հողատարածքները Կողմերի կողմից տրամադրվում են Համալսարանին անհատույց օգտագործման՝ բացառապես սույն Համաձայնագրի 3-րդ հոդվածում նշված՝ Համալսարանի խնդիրների կատարումն ապահովելու համար:

Համալսարանի ենթակառուցվածքի ընդլայնումը դիտարկվում է Կողմերի պետությունների կողմից իրականացվող ռազմավարական ծրագրերի շրջանակում:

Հոդված 13

Համալսարանի գործունեության ֆինանսավորումը

Համալսարանի գործունեության ֆինանսական ապահովումն իրականացվում է Կողմերի կողմից՝ Հայաստանի Հանրապետության պետական բյուջեի և Ռուսաստանի Դաշնության դաշնային բյուջեի միջոցների հաշվին:

Համալսարանի՝ սույն Համաձայնագրի 3-րդ հոդվածով սահմանված խնդիրների իրականացման համար ֆինանսական ապահովումը հիմնվում է դրա նպատակային ուղղվածության և բազմաթիվ ֆինանսավորման աղբյուրների վրա և իրականացվում է Կողմերի կողմից՝ իրենց ազգային ռազմավարական փաստաթղթերին համապատասխան, հաշվի առնելով իրենց ազգային օրենսդրության դրույթները, ինչպես նաև Համալսարանի կողմից՝ եկամուտ ստեղծող գործունեության և ֆինանսավորման այլ արտաբյուջետային աղբյուրների հաշվին:

Համալսարանը քաղաքացիաիրավական պայմանագրերի հիման վրա իրավունք ունի կատարելու աշխատանքներ և մատուցելու ծառայություններ, մատուցելու վճարովի կրթական ծառայություններ, եթե դա չի հակասում Համալսարանի խնդիրներին կամ Կանոնադրությամբ նախատեսված նրա գործունեության նպատակներին՝ Կողմերի պետությունների օրենսդրության համապատասխան:

Քաղաքացիաիրավական պայմանագրերի հիման վրա առաջացող քաղաքացիական իրավահարաբերությունների նկատմամբ կիրառվում է աշխատանքի կատարման, ծառայությունների մատուցման վայրի Կողմի պետության օրենսդրությունը:

Համալսարանը Կառավարման խորհրդի հետ նախապես համաձայնեցնում է օտարերկրյա կամ միջազգային ոչ կառավարական կազմակերպությունների կողմից ֆինանսավորվող ծրագրերին մասնակցությունը՝ համապատասխան համաձայնագրի հիման վրա:

Հոդված 14

Համալսարանի գնումների գործունեությունը

Համալսարանի գնումների գործունեությունն իրականացվում է ըստ գործունեության վայրի՝ Հայաստանի Հանրապետության օրենսդրության համապատասխան:

Համալսարանի գնումների գործունեության իրականացման սկզբունքների և ընթացակարգի հիմնական պահանջները կարգավորվում են Համալսարանի գնումների մասին Կանոնակարգով:

Հոդված 15

Իրավակարգի պահպանումը

Հայկական կողմը ձեռնարկում է համապատասխան միջոցներ՝ Համալսարանի տարածքում անվտանգության ապահովման և իրավակարգի պահպանման համար:

Հոդված 16

Վեճերի և տարաձայնությունների լուծումը

Կողմերի միջև առաջացող՝ սույն Համաձայնագրի դրույթների կիրառման և (կամ) մեկնաբանման հետ կապված վեճերն ու տարաձայնությունները լուծվում են նրանց միջև՝ խորհրդակցությունների և բանակցությունների միջոցով:

Հոդված 17

Փոփոխություններ և լրացումներ կատարելը

Կողմերը սույն Համաձայնագրում կարող են կատարել փոփոխություններ և լրացումներ, որոնք ձևակերպվում են առանձին արձանագրություններով և հանդիսանում են սույն Համաձայնագրի անբաժանելի մասը:

Հոդված 18

Սույն Համաձայնագրի ուժի մեջ մտնելը և գործողության դադարեցումը

Սույն Համաձայնագիրը կնքվում է 10 տարի ժամկետով և ուժի մեջ է մտնում ուժի մեջ մտնելու համար անհրաժեշտ ներպետական ընթացակարգերը Կողմերի

կողմից կատարված լինելու մասին վերջին գրավոր ծանուցումը դիվանագիտական ուղիներով ստանալու օրվանից:

Սույն Համաձայնագրի գործողությունը ինքնաբերաբար կերկարաձգվի հաջորդ 10-ամյա ժամանակահատվածների համար, եթե Կողմերից ոչ մեկը դիվանագիտական ուղիներով գրավոր ծանուցման միջոցով չհայտնի դրա գործողությունը դադարեցնելու վերաբերյալ իր մտադրության մասին ոչ ուշ, քան առաջին կամ հաջորդող ժամանակահատվածները լրանալուց 6 ամսից առաջ:

Սույն Համաձայնագրի գործողությունը դադարելու դեպքում Կողմերն ապահովում են Համալսարանի ուսանողների ուսման ավարտը, նշանակում են լուծարքային հանձնաժողով, որը կազմում է Համալսարանի գույքի լուծարքային հաշվեկշիռը: Լուծարքային հաշվեկշիռը ներկայացվում է Լիազորված մարմինների հաստատմանը:

Սույն Համաձայնագրի ուժի մեջ մտնելու օրվանից իրենց գործողությունը դադարեցնում են Հիմնադիր համաձայնագրի 1-ին հոդվածի երկրորդ պարբերությունը և 2-13-րդ հոդվածները:

Սույն Համաձայնագրի ուժի մեջ մտնելով՝ այդ պահին գործող Ռեկտորի լիազորությունները չեն դադարում:

Կատարված է Մոսկվա քաղաքում 2024 թվականի դեկտեմբերի 20 -ին, երկու բնօրինակով, յուրաքանչյուրը՝ հայերեն և ռուսերեն, ընդ որում՝ երկու տեքստերն էլ հավասարազոր են:

Սույն Համաձայնագրի տեքստերի միջև տարաձայնությունների դեպքում Կողմերն օգտագործում են ռուսերեն տեքստը:

**Հայաստանի Հանրապետության
կառավարության կողմից՝**



**Ռուսաստանի Դաշնության
կառավարության կողմից՝**

